

正定府志卷

地理山

山川

陸清獻云太行綿亘數千里傍正定諸縣之山大抵分派於太行卽滹沱慈水皆穿太行而入海亮哉斯言余攬形勝嘗本其意以爲著論矣然合全郡而指其大勢雖支分派別而不離其宗就一邑而相厥規模則山峙水流又各呈其勝嘗於問俗之餘歷覽各邑名山大川或天矯如龍或雄踞如虎或如鸞之翔或如象之卧或三公高峙於雲表或九女聳立於岩



間幾如山陰道中應接爲之不暇若夫恒衛如昨濟
泚別流問蒲渠石谷故墟尙堪彷彿而斯浹綿蔓惡
池等水淵源可溯陵谷變遷因端竟委亦足發好古
者憑吊欷歔之慕爰綜郡之山川彙爲一卷俾後之
覽者知是邦文物聲名之舊沐

聖朝德教之涵濡當生鼓舞抑山川靈淑之氣磅礴而鬱
積誕降固有所自來也人傑因乎地靈豈偶然也哉

山

奇石山 獲鹿縣西北二里怪石峻起山脉自虎山東
北迤邐而來環繞縣郭蓋縣之鎮山也上有元人磨

崖碑

海山

獲鹿縣東五里上有龍堂堂下有穴水常不

竭

橫山

獲鹿縣南十二里孤秀巒岼映徹城郭

玉山

獲鹿縣南三十里石粹白如玉

西屏山

獲鹿縣南三十里高數百仞峯巒連亘宛若

列屏爲一郡之勝西去井陘四十五里山跨兩縣間

層崖千霄形如卧虎一名虎山東有黑風洞可容千

人

封龍山

獲鹿縣南五十里界連元氏詳元邑山內

牛山 獲鹿縣西一里許上有雙井四時湧出不竭
草木茂盛水經其下

抱犢山 獲鹿縣西八里舊名草山漢書韓信伐趙使
輕騎二千人持赤幟從間道登草山而望卽此後魏
葛榮之亂民有不從者於此抱犢而死因更今名隋
仁壽四年李子雄破劉建於抱犢山下是也舊志山
四面險絕頂有二泉山之陽又有交龍洞

海螺山 獲鹿縣西十里因形得名北爲蓮花山下卽
白鹿泉隋因以名縣山之陽有聯珠洞

金珠山 獲鹿縣西南三十里山石青色名蘭蓋溫潤

如玉可琢屏風杯視器物

蓮花山

獲鹿縣西七里

磨兒山

獲鹿縣西七里蓮花山之北

九里山

獲鹿縣西八里山脊如刀又名刀刃嶺

虎頭山

獲鹿縣西七里山勢雄踞如虎又名虎峯

卧龍山

獲鹿縣北五里許其形如龍因以得名

佛光山

獲鹿縣北二十里北界平山縣南連虎頭山

大翻山

隋圖經鹿泉縣有大翻山今未詳所在

大臺山

井陘縣西北二十里趾削頂平雄秀峻拔羣

山皆處其下每臺頂有雲邑人以之占雨亦名五臺

山

百華山 井陘縣西十里林壑深邃石磴崎嶇旁有張

果洞

觀音陀山 井陘縣北四十里形勢巍峩連亘數里

圖尖山 井陘縣北六十里又名掛雲山

鳳凰山 井陘縣北四十里

劍山 井陘縣東十里形若長劍倚天故名

城山 井陘縣東南三十里山形似城一名障城山

元史金末太宗以焦德裕使正定其地悉平詔賜井

陘北障城田

馬頭將軍山 井陘縣北二十里

陘 山 井陘縣北五十里與獲鹿縣接界漢書井陘之道車不得方軌騎不能成列卽此寰宇記四方高中央下如井之深如竈之陘山視如井故名井陘亦名釧山穆天子傳獵於釧山之西河是也其險爲河北河東關要縣境諸山錯列大約與陘山相接連皆太行之支隴水經注所云長嶺通道卽釧躋也

按通雅齊桓伐楚次於陘楚世家魏取陘山蘇秦於韓曰南有陘山於楚曰北有陘塞在今汝鄭二州此元和志所謂太行第五陘也

射梁山 井陘縣東南五十里相傳秦將王剪伐趙下

井陘射堞於此

鸞臺山 井陘縣東南七十里相傳隋文帝嘗駐蹕於此故名

蒼巖山 井陘縣西南七十里層巒聳翠高出雲表中
有石泉雖旱不竭相傳妙陽公主證道處橋閣結構
空中古木環繞烟雲四起宛如圖畫

晒袍山 井陘縣東南七十里相傳妙陽公主晒袍於此

望山 井陘縣北六十里

屏峯山 井陘縣北六十里又北名雙峯山又北十里

曰靈山

雲鳳山 井陘縣東北四十里舊志昔有彩雲彌覆丹鳳來集故名山勢紆險元末土人保此爲砦

仙翁山 井陘縣東北五十里相傳張果尸解處上有紫雲洞

清風山 井陘縣東三十里有聖水洞歲旱取水以禱每得雨

行龍山 井陘縣東五十里上有蒼巖聖母廟

西屏山 井陘縣東五十五里上有白雲洞雲出輒雨與獲鹿縣接壤詳獲鹿山內

石人山 井陘縣東南三十里

天臺山 井陘縣東十里宋靖康間土人避兵於此

神山 井陘縣東南五十里上有古山神祠

筆架山 井陘縣南三十里

天清山 井陘縣西南十里

離隔山 唐書地理志井陘有離隔山今未詳所在

大茂山 一統志阜平縣東北七十里接曲陽縣界卽

恒山之嶺一名神尖石晉與契丹分界處今阜平曲

陽唐縣慶都皆緣大茂之麓夢溪筆談常岑半屬契

丹以大茂分脊爲界沈括曰恒山一名大茂山宋以

山脊與契丹分界

北山 阜平縣東北山嶺盤互縣境班峪平陽鵠子
諸川多發源於此又縣東三里有醒悟山峯亦高峻
玉芝山 阜平縣東北三里鹿芝得名下有龍潭禱雨
多應

鹿馱山 阜平縣東五十里山形如鹿南卽王快鎮
陳攤庄山 阜平縣南三十里山徑盤折路通靈壽
大派山 阜平縣西北五里又東爲小派山兩山對峙
林巒鬱然

銀河山 阜平縣西北八十里高峻插天

黑駝山 阜平縣西南八十里山勢高峻壁立萬尋東
阜平西平山南靈壽北山西五臺兩省交連四縣接
界

無奈寨山 阜平縣西七十里峯危路轉劔拔弩張上
可避寇故名

柏山 行唐縣西北四十里上有古柏

毘山 行唐縣西北四十里峯若列嶂相傳毘盧佛
化身之所

雙嶺山 行唐縣西北八十里雙峯並峙

箕山 行唐縣西北五十里一統志以峯形若箕而

名俗以爲許由隱此上有許由塚皆傳說也

牛飲山 一統志在箕山西漢時南行唐縣有牛飲山
卽此舊志調卽巢父飲牛處亦附會之詞

缶山 行唐縣北三十一里上有龍祠禱雨多應
玉女山 行唐縣北三十六里見金史地理志

西山 行唐縣西七十里

黑山 行唐縣西北五十里

龜山 行唐縣西北八十餘里

團山 行唐縣北六十五里

見龍山 行唐縣北四十五里

伏山 行唐縣南五里

文山 靈壽縣北六十里上有周文王廟或云趙惠文王前有龍池水極清冽

魯柏山 靈壽縣西北六十里東峯若翔鳳名鳳凰石西峯若卧象名卧象石石有竅人可僂而過又名玲瓏岩兩峯對峙飛瀑懸崖中建禪定寺多產柏

楸山 靈壽縣西北七十里山多楸樹故名上有古刹

佛護山 靈壽縣西北七十五里

漫山 靈壽縣西北八十里

祁林山 靈壽縣西北一百一十里前峯四列林谿幽

麗上建祁林寺

砂嶺山 靈壽縣西北一百一十里山產解玉砂砂隱於石石剝而砂始出色墨以碧質堅以潤玉工用之治玉所謂他山之石可以攻玉者是也

王母山 靈壽縣西北一百五里與平山縣接壤卽古

房山

朱山 靈壽縣西北九十里相傳朱買臣曾刈薪於

此縣志買臣吳人傳者訛云

按寰宇記載靈壽有石嘔山小而峻三面削絕惟南面稍可躋陟一名五岳山又名五臺山有五峯在縣

西北袞袞水出焉通志朱山一名石幢山一統志云無考二說不同

銀洞山 靈壽縣西北一百三十里舊時產礦處

溝山 靈壽縣西北一百三十里山形峭拔下有石洞形如獅子水從口出味甘而清居民資焉

石門山 靈壽縣西北八十五里北倚富豪山疊嶂巉削壁立萬尋分爲十巖作九石門皆懸崖中斷溪流湍激深寂幽杳睽隔人世山居數家柴門茅茨其男女蠢蠢與鹿豕相爾汝焉

富豪寨山 靈壽縣西九十里山勢峻拔高出雲表下視楸柏諸山若培塿然遇兵革邑人多避難於此山

北屬阜平

石佛山 靈壽縣西北一百二十里

大喫水山 靈壽縣西北一百五十里其北即小喫水

山山北即團箔口兩山對峙舊出礦

按漢志南行唐有牛飲山一統志亦云大喫水山即寰宇記所載靈壽牛飲山雷同如此

四嶺山 靈壽縣西北一百三十里四面皆險北接阜平縣界其東南十里又有六嶺山六嶺相連

滴水塘山 靈壽縣西北一百三十里麓有石洞泉出其中流泉爲塘其水甘以清居民多取用焉

黑駝山 靈壽縣西北一百九十里與阜平界詳見前